

Стихиры Введения во храм на стиховне, глас 5:

**Приведутся Царю девы в след Ея, // искренния Ея
приведутся Тебе.**

Анна Божественная благодать яве, / от благодати данную,
чистую Приснодеву / приводит с веселием в храм Божий, /
призвавши ити пред Нею отроковицам, / свечиносящим и
глаголющи: / поиди, Чадо, / Давшему Тя буди возложение и
благовонный фимиам. / Вниди в незаходима и увеждь тайны, /
и уготовися быти Иисусово вместилице, / веселое и красное, //
Подающаго миру велию милость.

**Приведутся в веселии и радовании // введутся в храм
Царев.**

Внутрь в храм Божий / Боговместимый храм возлагается,
Дева Всесвятая, / и отроковицы Ей ныне, свечиносяще
предходят. / Играет родителей сопряжение изрядное, / Иоаким
же и Анна, ликовствующе, / яко родиша Творца рождшую, /
Яже ликовствующи в Божественных скиниях / и питаема
рукою Ангеловою, Всенепорочная, / Христа явися Мати, //
Подающаго миру велию милость.

Слава, и ныне, глас 6:

Днесь собори верных, сошедшися, / духовне да торжествуим /
и Богоотроковицу Деву и Богородицу, / в храм Господень
приводиму, / благочестно восхвалим, / предъизбранну от всех
родов, / во обителище всех Царя Христа и Бога: / девы, свечи
носяще, предъидите, / Приснодевы чтуще честное
происхождение, / матери, печаль всю отложивше, / радостно
споследуйте Матери Бога бывающей / и радости мира
Ходатаице. / Все убо радостно, / еже радуйся, со Ангелом
возопиим Обрадованней, // присно молящейся о душах наших.